

王文敏公遺集

王文敏公遺集序

曩者士鑑跋張肖齋苗仙麓兩先生論心圖因推論  
國朝學派之盛躋漢轢唐而主持風會者必有一二鉅  
人長德倡之於朝而天下翕然從之蓋自乾隆季年以  
逮道咸之際厥惟阮文達公祁文端公爲眾流之歸墟  
焉同治中興右文稽古海內所宗仰者爲吳縣潘文勤  
公常熟翁文恭公而其時接武於吳縣常熟者實爲福  
山王文敏公公少習贈公蓮塘觀察家訓受業周夢白  
先生之門飫聞劉燕庭方伯陳簠齋學士緒論通漢學  
家言尤究心金石與張文襄公吳憲齋中丞鮑子年太

守爲身心性命之交文襄與公爲姻婭督蜀學日介繆  
藝風參議至京師謁公公時已名滿都下鑒別宋元舊  
槧攷釋商周彝器得公一言引爲定論藝風旣與公締  
交如平生懽公屢試有司數陳古誼連不得志至己卯  
乃受知於藝風論者以爲媿談而藝風與公終身相處  
於師友之間公以庚辰入翰林一歸里門迂道濰水復  
省贈公於成都單車行役馳驅河洛秦蜀之郊所至則  
鬱殘碑訪賸碣采獲百端輦至京邑公旣廻翔三館綿  
厯十年中朝言學者自吳縣常熟外惟公丰采隱然負  
時重望名流縱萃趾錯於門甲午以大考擢侍讀特

命入直 南齋 乾清宮之東北爲 昭仁殿貯 天

祿琳瑯殿側有古董房儲藏書籍乃乾隆時諸臣所未  
搜輯者公與同直諸公奏請編訂目錄得宋元明槧本  
若干種撰爲提要擬名曰 天祿琳瑯補編稿本脩具  
會以事變不果奏刊公端居深念動關天下大計日高  
之役奉 命回籍辦理團練事定還 朝晉國子祭酒

洎庚子拳亂作復 命公會辦京城團防時公退食之  
暇校訂棲霞牟陌人先生同文尙書手稿顧謂士鑑曰  
牟先生一生精力萃於是書其精邃淵奧有過於季迷  
良庭諸老者吾誓必理而董之以彰絕學特世亂力殷

未知能卒業否因唏噓慨歎不能自己指園中古井曰  
他日若有非常之變吾其得死所矣七月二十日同直  
禁廷敵氛偏近遂與公別翌日兩宮西幸公聞警  
慷慨從容大書主辱臣死數語具衣冠再拜自湛於井  
公夫人謝冢婦張同殉士鑑追扈豹尾左轉河汾聞公  
殉節哭於中達賦詩弔之甲辰還朝適公子漢輔漢  
章闢公京邸園林爲祠堂天人眉宇瞻拜悽愴訪問公  
所蓄金石圖籍太半散佚著述存者放紛待理宣統初  
元公女夫吳溟生觀察集公經進稿奏疏稿二卷印於  
金陵士鑑私意公之文字當不止此櫟樾修門未遑甄

采國變十載流轉江湖漢輔歿於析津漢章百計搜求  
於經進奏疏稿外得遺文遺詩福山金石志殘稿天壤  
閣雜記漢石存目都爲遺集八卷吾友翰怡京卿愜慕  
忠徽煇章文獻受而校刊之命士鑑爲之序士鑑以爲  
公之孤忠大節自有千秋初不藉文字以傳而卽此僅  
存之文字亦皆萌柢經術擇擇治要具匡時勸學之懷  
士鑑追隨日久論學同源今則偷活草閒傷時感逝謹  
舉公生平志事弁諸簡端不獨乾嘉盛時渺難接軫卽  
俛仰三十年前方寓清晏羣雅彬彬亦復曠如隔世此  
則關於學術絕續之憂世變賢遷之感不禁綴筆而涕

泗垂膺也癸亥三月吳士鑑謹序

王文敏公遺集序跋

自漢以來儒林文苑兼者蓋尠若儒林文苑而兼忠義則惟吾文敏公獨有千古也公殉庚子之難遺文大半散軼孤子崇烈苦心蒐輯得奏疏二十二篇經進彙上一篇問序於余公少承家學受業於周夢白先生篤耨金石精於考訂三代而後彝器泉幣銅玉陶瓦碑刻之屬廣蒐博識於其真贋灼然也自漢及今之學派洞澈源流漢學師承宋學淵源二記並能提其要而補其所不及宏總萬流貫穿百家言之鑿然也宋元以來迄於本朝之精鈔舊槧目覽手斟靡所不闕凡板本之佳



惡點畫音訓之淆譌鉤考詳密洞若觀火厰肆諸估人  
奉若嚴師勿敢欺也作院體書而有金石氣嘗云作一  
字須含十二意一箋一扇世人得之以爲奇珤自入翰  
林值 南齋尙方貼絡所需其章幅較大者 孝欽皇  
太后必降口敕曰令王懿榮書 醇賢親王栗主特旨  
命公繕寫供奉蓋稽古之榮久邀 天鑒庶幾不負所  
學矣居常自謝曰文筆非吾所長然所韞旣厚信筆抒  
寫皆翔實典雅堅重密栗專家或有不逮誠不願世俗  
知也此集特公之緒餘大半脫稿時卽已見示公之歿  
也僅十一年而世事日新月異昔所論奏今視之如隔

年百葉矣讀公前後奏疏如請復古本尙書臚陳 木  
朝儒臣十三經疏義想見 先朝修文偃武海內承平  
有孫通縣蒔陳農求書之遺風以故文學侍從之臣得  
以稱述老先闡彰儒效以視今日何如也雖然使公至  
今猶存其出入諷議輔導 冲皇必更有障遏橫流扶  
翼聖教者惜乎天不憖遺也綜公生平見得思義見危  
授命久要不忘平生之言而又能文之以禮樂殆不愧  
爲孔門之成人烏虜今豈可復得哉公別有四家館課  
之刻印於京師板藏余家其他論著當次第蒐刻之  
宣統三年歲在辛亥三月同學弟樊增祥頓首拜序

宣統元年己酉王生翰甫刻其尊人文敏公箋奏屬余爲序國變後翰甫至京以刻本示宮官宮官以呈孝定皇太后后覽之泣下蓋文敏值南齋久最爲

孝欽

景帝所眷

孝定夙識其名序中追述恩

紀而歸本於公之忠愛斐篤

孝定於玉步旣移如

聽水雲琴調宜一悲不自勝也乙卯冬翰甫自天津來手一冊畀余曰先公不以詩名今檢遺集僅此兩卷惟吾師審定之余嘗謂學人之詩與詞章家異宋之二宋二劉及曾子固皆學人之詩也夫公序子京尙矣若公是公非兩先生篇什皆不甚表襮而南豐尤以不能詩

著稱要其所作不足於色而富於理不雕其質而落其  
華才人墨卿或薄視之而好學深思者恆反復而不能  
以已其質厚其味醇也文敏目營四海於學推夢白周  
先生而詞章偏嗜下走偶有所作常就余商定公之處  
已則然顧其微至朴澀處余雖百思不能到也當同光  
閒潘文勤主盟日下出其門者颺舉雲從人握珠而家  
抱璞矣及今觀之獨悲菴詩二卷不事華縟言外有意  
意外有味豈非繒采雜陳而筒布獨溫般般滿前而建  
餅獨腴乎文敏出常熟吳縣之門而皆不敢以師道自  
居非獨氣有以攝之其學之閎肆龐魄實足使二公瞠

視卻步也遺詩雖無多實與悲菴異曲而同工味雋於  
二劉而義豐於子固其在北宋殆劉跂學易集之亞匹  
乎有清一代之學人無不從詞章入是以黃顧朱毛鏐  
王翁阮皆以詩文名世而余所最服膺者則鮎埼亭詩  
也文敏詩不同乎悲菴悲菴不同乎鮎埼而自余讀之  
則皆如嘗異味如聞古樂如掇仙花總歸於不凡而已  
十一月十九日同學如弟樊增祥謹序

郡國出一偉人必留心于郡國古今人倫可以傳後之  
事偉人乃不虛生福山王文敏公自幼留心鄉先哲手  
澤欲輯齊魯先哲遺書搜輯之稿極夥僅先刻數零種

以爲徵文之券又珍重先哲手澤輯爲海岱人文一編  
至庚子之變公殉國而書稿亦各散佚海岱人文尙存  
五十三冊壬寅冬予來保定其嗣漢輔表姪迺送藏憲  
處代爲寶守公傳先哲之心可謂勲矣公精鑒賞曾奉  
命檢校石渠寶笈臧件性又喜考金石憲生平所見  
目力之精莫有過公與先外舅陳盦齋先生者公嘗有  
兩漢六朝金石目聞已有人付梓矣其箋奏一集亦經  
漢輔兄弟早爲刊成已經 孝定皇后懿覽公雖不以  
詩名而詩集二卷亦考據精詳造語奇艷無復風雲月  
露之習自足成一家言非僅謂以人傳詩也夫言者心

聲人各聲其心之聲而規規焉曰陶謝曰李杜曰蘇黃  
亦何爲乎後之讀公詩者亦諷公之聲知公之心而已  
足矣憲與公爲表兄弟公又以女妻憲之次子對怡公  
之誼知公之心莫憲若矣今將付梓數言以贅于後戊  
午三月吳重憲跋

王文敏公遺集序

福山王文敏公負大雅宏達之才際 稽古右文之世  
由翰林曝值 南齋三任祭酒庚子拳匪肇禍公撫膺  
悼時慷慨赴義 朝廷賜卹予謚逾於常典所以褒忠  
也哲嗣漢章觀察奉公遺集屬爲編輯承幹受而讀之  
謹掇言簡端曰自昔羣言淆亂必有一二巨儒干城吾  
道近三四十年間士驚於新說土苴六藝遂成爲風氣  
公獨仰承乾嘉諸老輩抱守遺經思復漢經師傳注之  
舊以謂諸儒網羅散失搜輯佚文漢師墜緒賴之以延  
其諸天文算術輿地方志政書奏議私家譏著卓然經



世之書實足恢宏至道於是有請續開 四庫館之奏  
又以諸經疏義意在輔注所從之注惟在善經魏晉以  
後易無完注書無完經近則安陸李氏周易集解纂疏  
陽湖孫氏尙書今古文注疏實足救正唐孔穎達正義  
之失更推及諸家所著羣經疏義以謂家法嚴而後古  
義堅門徑清而後學派正於是有請列 本朝諸儒所  
撰十三經疏義于學宮之奏公又好金石之學謂形上  
爲道形下爲器古者藏器於禮其銘詞又皆大小雅之  
才是道器合一證經考史所必資也凡公所建議皆所  
以翼經明道卽異說自無所容其喙昔眉山蘇氏序六

一居士文謂其學推韓愈孟子以達於孔氏今承幹謂  
公之學推乾嘉諸老以達於賈馬許鄭雖所值之世不  
同其爲息邪詎訛作吾道之干城則一也序而論之俾  
後之讀公集者識所忻趣焉癸亥浴佛日吳興劉承幹

王文敏公遺集目錄

卷一

經進稿

卷二

奏疏

卷三

奏疏

卷四

求闕文齋文存

卷五

正讀亭詩

卷六

福山金石志殘稿

卷七

天壤閣雜記

卷八

漢石存目

王文敏公遺集卷第一

求恕齋叢書

福山王懿榮著

吳興劉承幹編

經進稿

醇賢親王園寢冬至祝文

天心來復世德遐昌鸞笙噦噦犧尊鏘鏘靡瞻

神隧引睇

顙蒼敢陳

弓玉式此馨香伏惟尙

饗

右一道

葭雲飛珣箭律調鍾璽瓚賚富椀蕨銘崇眷承  
於穆饗協豐融

靈原巍御嘉告潛通伏惟尙

饗

右一道

醇賢親王碑文

光緒十八年四月二十一日

光緒十六年十一月禮臣奏上醇賢親王喪儀以碑文

請欽奉

皇太后懿旨碑文皇帝親製

子五御名承

命維謹越三年歲次壬辰四月筮日恭舉葬禮於是齋

邀流涕譔次勲德勒諸貞石其辭曰我 本生考醇賢  
親王 皇祖宣宗成皇帝第七子也母 莊順皇貴妃  
生而明敏敦厚孝謹爲 皇祖所鍾愛六齡入上房讀  
書十齡能騎射習火槍 文宗顯皇帝御極封爲郡王  
眷遇優渥往往乘舟賦詩或從獵行圍一如家人禮  
穆宗毅皇帝嗣位 兩宮 皇太后垂簾聽政晉封親  
王授御前大臣 命在弘德殿照料讀書入則輔導  
聖躬出則規畫戎略創立神機營選八旗兵丁之材者  
親加訓練由是京師有礮隊勁兵同治十三年 穆宗  
升遐 皇太后命予小子入承大統我 本生考醇賢

親王深懷謙抑於 皇太后前辭免職務 懿旨俯允  
而倚畀益隆 命以親王世襲罔替凡軍國重大之事  
無不諮焉既仍管神機營又以創設海軍 命綜其事  
歲丙戌躬閱海口形勢遂由天津歷煙台旅順輪舶馭  
風海波不興各國使臣鱗集羽湊爭覩顏色於是講求  
船械議闢鐵路恢恢乎有經營六合之規蓋上稟 慈  
訓下集羣謀殫心竭思未嘗一日釋也至於經始大工  
百度具舉程材度地昕夕靡懈而雄文麗句浩若江海  
舉筆立就得於登臨覽觀時爲多嘗輯典謨中法語大  
書一通并述 列聖艱難之業 東朝覆育之恩成誠



勉詩二章揭諸講殿之壁俾予小子出入省覽又嘗鑑  
宋明議禮之失具疏密奏 皇太后謂歷代繼體之君  
推崇本生父母當以宋孝宗不改子傅秀王之封爲至  
當將來如有援引治平嘉靖之說進者務加屏斥俾千  
秋萬世勿再更張迨光緒十五年大臣中有請議尊崇  
典禮者仰蒙 皇太后宣示此疏褒揚我 本生考醇  
賢親王以爲純臣心事古今莫及嗚呼儀禮爲人後者  
之義 高宗純皇帝渙議辯昭示於先 本生考醇賢  
親王豫杜妄論疏闡發於後實足以盡人倫之極則而  
立臣子之大防此所謂一言而爲萬世法者也 本生

考醇賢親王以道光二十年九月二十一日誕生光緒十六年十一月二十一日薨逝春秋五十有一寢疾之時 皇太后臨邸看視及薨 特諡曰賢自殯及葬親賜奠醑者數四蓋曠典也 園寢在京師西山妙高峰首庚趾甲規制如親王禮嗚呼以 本生考醇賢親王之宏猷茂績允宜夾輔 宗 社用保乂我邦家而天不假年遺志未竟則子小子之思慕其有窮期耶敬舉大節質言無文以申 慈命以告臣民以垂永無極之世

晉贈太保致仕大學士寶鋆入祀賢良祠祭文

奉

天承運

皇帝制曰朕維紀鼎彝之事業亮采勛高薦俎豆之馨  
香崇祠典重松銘表隧旣撰德於綸襃椒精升筵宜垂  
榮於酬祀式隆爰侑用答勤勞爾致仕大學士寶鋆學  
識宏通才猷練達起家禮部已揆英聲供職翰林尤標  
雅望迨擢居於卿貳遂預贊夫樞機表許國之盡忱匪  
躬蹇蹇建匡時之茂績惟日孜孜敷教旣寬爰修九法  
讞疑旣愼復秉六銓洵歷試之有庸迺元僚之特簡休  
休之度足以綜羣材翼翼之心足以周庶務教卷阿之

吉士領秘閣之清班總閱禁營則步伐期於整銳專司  
內府則出納矢以恪勤洎致政於懸車猶承恩於詔綰  
方期優暇遽歎淪徂緬政府之訐謨每思前績稽秩宗  
之典禮蓋有舊章懿彼賢良宜膺廟祀於戲雲綵聿煥  
風節常留牲用絜而幣用量庶歆嘉薦事功勞而民功  
力永著徽庸靈而有知尙其來格

晉贈太保致仕大學士寶璽碑文

奉

天承運

皇帝制曰朕維國家垂恩錫命聿昭眷舊之懷人臣宣

力奉公尤重酬庸之典生則任隆鼎鼐襄丹扈以綏猷  
歿則名載旂常鑄翠珉以紀績絲綸賁寵竈窳增輝爾  
晉贈太保致仕大學士寶璽器本主璋才兼經緯溯都  
爾古之昆弟燕翼百年維索綽絡之宗支蟬嫣四相始  
分曹於儀部繼晉秩於宮僚鰲禁旋躋鳳池游歷佐容  
臺之禮樂參計省之度支籌緩急而屢進讜言樸誠自  
矢備儲胥而力裁糜費寵辱何驚遂受

先皇特達之知用畀密勿親承之寄回翔八座敷歷五  
卿總萬國之梯航邦交式固閱六軍之輦旂戎政聿修  
洎乎簡任參知旋登端揆名協金甌之卜才符玉鉉之

升領袖槐廳則以清修砥士楷模芸館則以正學育材  
疊錫宮銜屢司文柄迨優游私第殊恩靡閒於初終緬  
瀑直內廷碩德允符於中外何圖隕謝良用盡傷旣考  
禮以錫寵章爰易名而垂令聞謚曰文靖稱其平生晉  
謝安之從容宴衍資以廟謨元虞集之表裏彌綸用爲  
世寶於戲旌黃扉之勛烈在大廷寶典備哀榮流青簡  
之聲施爾後嗣宜業承忠孝豐碑傑峙永炳千秋

贈太子少保銜致仕大學士閻敬銘祭文

奉

天承運

皇帝制曰朕惟鹽梅桴鼓生材原一德之兼資酒栗脯  
殺察祭乃五官之舊事隆典型於曩昔鬱悼惜於衷懷  
用撫遺章特頒嘉奠爾贈太子少保銜致仕大學士閻  
敬銘操履清勤才猷練達始論官於翰苑繼分職於戶  
曹值荏苒未靖之秋早資偉略與芻粟總司之役同奏  
膚功陳臬事而風清荆楚管鹽政而詔下青齊於是超  
膺疆寄受朝廷特達之知疊沛綸音勛臣子作忠之節  
蒞雄藩於海岱咸慶收綏養冲抱於林泉不渝雅素司  
馬光之謝病身旣退而名益高富彥國之振饑吏不疲  
而民獲濟鑒其怨勞能任降天語以頻褒知爲慈惠之

師起地官而晉擢迨入贊夫樞密更兼攝夫本兵訐謔  
辰告紫禁駢馳典禮匡勳黃裳扈蹕惟異數之常霑益  
公誠之自矢愼覈源流本周官九式之法詳稽掌故修  
唐世六典之書國家玉鉉升才金甌卜相參知旣拜揆  
席旋登後先皆不次之遷內外惟一心之任體高年之  
沉瘁勉解其機務之煩冀早起夫沈疴曲遂其邱園之  
請望中條之霽色歲月方長虞上界之星芒老成遽謝  
典重飾終恩隆奠醊爰考績而錫嘉名複製詞以申篤  
念憶贊襄於左右庶績咸熙綜廉讓於初終三公不易  
於戲目極於河水梯山風燭悽愴神歸乎蒲關高壘牲



體苾芬馨香往薦靈爽來歆

贈太子少保銜致仕大學士閻敬銘碑文

奉

天承運

皇帝制曰朕惟勛高輔弼表人臣宣力之忠典備哀榮  
示國家酬庸之禮生則任隆鼎鼐歿則名列旂常芝綽  
用頒松銘式煥爾贈太子少保銜致仕大學士閻敬銘  
居心亮直莅事清勤起輒發乎詞垣踵翔回夫郎署峙  
糗莢於荆楚墨經移忠管鹽筴於青齊紅旌超拜藩條  
臬樹漢江攝風化之司牙燾琬文海岱成巖疆之寄李

栖筠宰相重望頻煩北闕之書謝安石朝野翕稱不墜  
東山之志屬偏年於元二惟晉與秦慰軫廬於九重自  
雍及絳卽家徵授農父爲順保萬民之官在職兼行夏  
卿有董正六師之責直樞廷而親承密勿參揆席而益  
著公誠旣薦陟夫元僚尤渥霑夫異數匪躬蹇蹇當官  
則勞怨並任惟日孜孜體國則源流統計楊綰之裁決  
庶務兼領戶曹杜佑之諳習舊章董修邦典彰扈從而  
賜服象叶黃裳眷勞勩於趨班驄乘紫禁乃軍國正資  
夫倚畀而林泉堅請乎優容富彥國謝退汝州後先存  
問歐陽修僑居潁上奄忽淪徂援禮節終加恩醊祭第

幃輅於春官驛珍饈於御厨謚曰文介載在史書名圭  
罷錫撫千餘歲以茫茫貞石論操懷一个臣兮斷斷於  
戲輔丹扆以綏猷早樹鹽梅之芳烈鑄翠琅而紀績長  
留河嶽之英靈寶勒豐碑昭垂來禩

贈太子少保銜長江水師提督李成謀祭文

奉

天承運

皇帝制曰朕惟國家治隆武備雅需禦侮之材人臣勛  
懋戎行禮有追榮之典睠勤勞於往昔鬱悼惜於衷懷  
用撫遺章特頒嘉奠爾太子少保銜長江水師提督李

成謀賦性樸誠秉姿剛毅奮從行伍奏披堅執銳之功  
擢自偏裨展掃穴擒渠之略值東南之未靖命將帥以  
徂征宣我洪威殲茲小醜由武弁而游膺節鉞令肅貔  
貅自湖湘而轉戰江淮鋒摧蛇豕爰頒勇號洵果銳之  
名符俾領舟師實肅清之績偉援枹誓眾則義壯三軍  
擊楫臨江則氛消五省用是冠飄翠羽渥沐恩褒服稱  
黃裳隆邀寵錫迨遂其省親之請愈勉夫報國之忱率  
閩海之樓船旌旗動色樹長江之鐘鼓草木知名入覲  
先皇迭蒙

溫諭韜鈴夙裕贊中興戡定之功任使攸隆備闕外股

肱之寄兵輪兼管靖海國之波濤使節常巡整水軍之  
步伐朕嘉其武略錫以宮銜作我干城方一心之匪懈  
嬰茲疾疾何二豎之不虞奄逝倏聞軫懷倍切緬大星  
之隕耀遽失鄂褒冀商嶽之降神再爲申甫惟嘉名肇  
錫迺茂勩長思功紀旂常慨英風其如昨光生筵几顯  
恤命而有加於戲庶靈爽之來歆牲牷在御表勛名於  
不朽竹帛永垂往荐馨香尙其祇受

晉封多羅端郡王冊文

奉

天承運

皇帝制曰翦桐圭而燕土爵重分藩錫柅鬯而疏封勛  
隆夾輔值垓埏之同慶宜恩澤之先施咨爾多羅貝勒  
載漪派衍璇源支分玉葉修身抑抑式衛武之恪恭好  
善孜孜儀劉蒼之誠篤允昭令德聿沛殊恩茲封爾爲  
端郡王錫之冊命於戲克忠克孝斯爲臣子之隆規維  
親維賢勿替國家之休命益思勛勵永荷寵綏欽哉

晉封多羅端郡王繼福晉博爾濟吉特氏冊文

奉

天承運

皇帝制曰錫爵重列藩之寄榮預分茅觀型表內助之

賢譽彰采苻惟象服克稱夫令淑斯龍章特著夫褒揚  
咨爾多羅端郡王載漪之繼妃博爾濟吉特氏德備柔  
嘉行昭敬慎鏘八鸞於桂邸翟莚增華迓百兩於桐封  
珩璜表懋徽音旣嗣恩錫宜頒是用封爾爲多羅端郡  
王嫡福晉錫之銀冊於戲維屏維翰永重帶礪於萬年  
宜室宜家聿賁絲綸於九命芳規益勛後祿長延欽哉

先師孔子告祭文

維

先師道重明倫經成教孝正萬世之綱常定後天之仁  
義七十子無思不服能說諸心五百年有王者興必來

取法茲以

慈闈萬壽敬舉前章疊晉

徽稱天人慶洽衍箕子鴻疇之福假此

神庥采魯侯燕喜之詩登爲國頌專官致告殷薦惟虔  
昭格有靈繁禧用賁

長白山告祭祝文

惟

神功崇發祥德合峻極唐著稱於昀志夏錫名於益經  
肇基王迹仰天作之高山孔厚版章普

靈貺於寰海州永吉而綿福祿江混同而一車書茲以



慈闈萬壽之期洽懷柔百神之禮

徽稱疊晉秩典並興如岡如阜試歌周天保之六詩以  
候以迎爰取明歲豐之八曲式薦泌芬

神其歆格

光緒十九年恭進 起居注後跋

欽惟

皇上貞明啟運

則大陳櫺

樹神宰而制八方

坐圭臺而調六氣

紫庭粹合銅渾將斗極齊懸

丹展神凝玉琯共風循相應頌砥平於

禹甸十九年

道被寰區環海國於

堯襟億萬里塵清亭塞

臣

榮叨石館職任銀編翹

北拱而傾葵依

光雲日竭南山之猗竹未測津涯伏見

皇上體

天之仁

躬帝之孝

創經綸於寶思

括風雨於櫺扉

紫幄光煥涓日潔

泰壇之薦黃琮色燦祥雲護

坎澤之靈翠瓚朱絃禮東門而

朝日星迴嶽動重右社而

答陰

九廟遺弓動羹牆之積慕四時應節

奉祠禴而申虔

隆仙樂於韶英宮懸禮備

眷

珠邱之柞槭草樹

恩周

金祀承懽備

一人之孝養

璿闌介祉合萬國之忻愉熊羆駝峰

問豎視

太任之膳宗彝粉米

披衣得萊子之裳固已凝床於

愛景

慈雲

合撰於

天心

祖武而乃

修和庶政亭毒羣生

彤廷多日接之僚丹牘有宵批之諾月卿分職三珪銓  
棘序之風天秩調邦六府變槐衢之典飛鶴書而赴隴  
鳴鳳於是棲梧

詔鯨浦而搜珍潛鱗由茲擢秀乃者祝添籌於

慈籙開

恩榜以徵賢皇華馳稽古之英使車結轍白屋擷通經之彥考藝登庸棘瑱風清申定制於焚香撤席

楓宸日永昭舊章於糊名易書職重千城校鷹揚之武選禁嚴任子酬鵠髮之殊勳舉凡魚目珠淆庸流鋌險靡不惕以茅門之法科之玉律之條勸東作之農桑

躬扶黛耜閱西郊之雨雪將事

丹楹板屋祁寒時繁

禹思鱗塍水旱卽動

堯吁蓋北溯

陪京南逾江介西臨唐魏東逮青齊雖屬下邑之偏災

罔不

湛恩之立沛啟白藏而議賑漕轉餘糧

命掌庾而蠲租歡臚部屋彌復

睠懷首善

軫念

皇都間有流庸設廠則人人食足培成富庶發倉則粒粒雲腴近甸揚波偶溢狂瀾之障疆臣銜

命爰遵瓠子之河石隄下而白壁沈鴻隄永固亥旣呈而庚辰隙駛箭安流良由

指授機宜百靈感而陽侯懾服從此民趨耕鑿九陌連

而里巷歡顏至於

鍾遺念於老臣飾以易名之典

篤隆情於循吏崇之肖像之祠五法平情獨嚴懲夫墨吏三年考績特

申諭乎大僚水衡節如阜之財聿昭

儉德土木重原估之值

坐燭冥情

睿略防微肅干廬之禁衛材官挾纊

恩七萃之公徒風舉雲搖合虎賁而校射春省秋繕矜  
狴犴而簡罕南車來蕃服之臣地圖拜獻



北闕遣輜軒之使天節遙馳巍巍乎

神功不窮蕩蕩乎

聖人無外唐哉皇哉美矣備矣然我

皇上猶復

萬幾勅學

勤誦習於丹牋五夜

求衣設觚棱於警枕

功成旰食

泰階忘七起之勞

負重春冰

離象揭重輪之照

齋宮信宿猶藻煥乎

天章

御壁輝煌備笙簧夫古訓此則

帝寰已治猶

珍惜於分陰

神化無方莫形容於洪筆者也

臣

等晨趨玉鑰夕候院

鈴敬述

皇儀藏之金匱翹欽

天步允哉

道契乎金繩臚舉

綸音長此藻鋪於翠琬

進

皇太后六旬萬壽恭賦

洪維

皇太后仁符厚載

德嫔圖穹布

懿徽於

萱幄垂

慈訓於

蒿宮

福躬迪吉

壽寓延洪需汪濊之

湛恩二萬里廣輿胥被慶綵長之

聖算億萬年

丕祚無窮

鳳展綏猷欽

經文而

緯武

龍軒錫祐瞻

道一而風同於時歲紀敦牂躔分析木

周甲延釐

昌辰竺福

治光金鏡徧繡壤而軒蓂瑞曜璇圖迓

蒼穹之弗祿

鴻疇丕演

推恩則蕃祉葳蕤

鳳詔遙頒戴

澤則桐生蒨藟爾乃先諏吉日恭晉

徽稱璘玢

璆冊燦爛珠繩

嘏賡

天錫

壽祝川增知中國之有

聖人叶風雲於律呂瞻

深宮之隆

孝養興仁讓於黎蒸

謨烈巍巍仰

乾坤之翬覆光華縵縵頌

日月之升恆懿夫彩炳弧南

禧凝

闕北開闔闔於

九天集冠裳於上國凡夫順則之羣黎襄猷之眾職宗  
支之實胄派係丹潢肺腑之懿親

恩承

紫極共偕摺笏紆紳之列頌禱

康齡咸遂歌風獻日之忱涵濡

至德至於騎象衣魚之輩雕題繡額之倫縑馬紈牛之  
貢皮冠卉服之賓職方所未載王會所未陳虔封銀葉  
之面

恩波遠沐來進金仙之象

德意遐臻帑鞫膺以頌

純禧共球用集嘏嘏都盧而歌

保艾道路咸遵

皇上乃詣

璇闥扶

玉輦拜

洪禔頌

盛典瑞日曈曨祥雲舒卷塵清

紫籙



鳳輅初臨地接

丹瀛鸞旗徐轉瓊鼎銀甕占寰宇之祥呈玉簡球圖欣  
聖慈之祚衍

蓬壺麗景

太液澄波蔥珩霧集艾綬星羅仰

慈懷之愉悅慶

邳治之修和晉康爵而祝

期頤鼎銘綰綽披寶笈而綏

福祿經誦貝多鳳雁麟肴奉飴馨而飽

德雲璫月琯諧搏拊而賡歌且夫

盛德所以迓庥徵

豐功所以綿福紀

仁育所以奠萌黎

義正所以同文軌

蠲租詔下澤免嗷鴻樵竹功成穴無漏巖

厯卅年之宵旰式煥

徽猷頌

六表之康強永綏

介祉

皇上

歡承

愛日景戀

春暉奉璣盤於

蘭殿

勤定省於

椒闈

寅承

寶訓丕闡

慈徽炳

泰嘏之瑞符香浮周畢賀

三才圖會卷之十一  
坤成之令節

彩舞虞衣

得祿

得位

得壽

得名備

天家之五福無黨無偏無反無側昭

帝命於九圍於此時也

景祐駢闐

醴恩布濩瓌版鏤

釐金甌鞏

祚

壽星明而

仁宇咸躋

壽錄晉而

億齡永駐

微臣

權領成均叨逢

盛遇

禁垣珥筆紀

上瑞於星雲

慶典稱觴荷

殊恩之雨露效嵩呼於

螭陛敬抒葵藿之忱厠華祝於鴈行願獻臺萊之賦謹

作頌曰

聖清受

命奄撫八殛

繼繼繩繩

治邁羲軒於鑠

慈聖纘啟祥源

垂簾

訓政

奠我黎元

嫔德任姒

揆迹簡嫔

大化苞育萬彙咸敦

純禧際瀛

康祺被坤吾

皇式

訓受

福便蕃

慈顏有豫

祁幄榮護祇承

璿旨宏賁

恩言

聖釐大來如春之溫千禔百福芻蕘雲屯祝

萬萬壽長荷

天恩

王文敏公遺集卷第一



王文敏公遺集卷第二

福山王懿榮著

吳興劉承幹編

奏疏

京員津貼銀兩更定名目疏

光緒十年二月初八日

奏爲部議京員津貼銀兩籲請

天恩準飭各督撫妥籌閒欸更定名目作正開銷以維  
士風以端政體恭摺仰祈

聖鑒事竊臣伏見去年部臣以議給京員津貼銀兩入  
奏得

旨允準各省督撫通籌外銷閒欸相繼登覆或有不擇名目及未作正開銷者以

朝廷寬厚正大之舉而臣下擬議乃爲苟且敷衍一時之計言之無文行之不逮政體何存士風何在是以詹事府右春坊右庶子宗室盛昱山西巡撫張之洞踴躍難安先後上言屬詞微至然臣猶惜其或激或諒陳義

不古臣惟君臣之倫以道相合見知聞知昔爲一體三

代而下臣節日卑自漢以來以文學得官始於叔孫通請太常試士首成於公孫宏寢及後世士風儒氣蕩然無存史冊深文自然流露始曰尊賢漸曰用人始曰重

道漸日察廉下士承流昧其本誼目不見書冥焉罔覺  
萬鍾禮義不辨久矣豈知講學修業所託甚尊一命初  
膺詎便稍褻夫自視太薄者予人亦將不厚臣節日卑  
則臣道不立臣道不立則至治難期竊維我

朝大化涵濡二百餘年

上之待士與士之自立當不出此

臣

家累世受

國厚恩八代生計皆資官祿

臣

之值此豈敢重有所矯

蓋有所重矯者必有所甚貪有所甚貪遂不可問

臣

固

恥之伏請

皇太后

皇上宸衷獨斷飭下部臣及各省督撫將此項銀兩妥籌開欸更定名目作正開銷既維士風亦端政體正名之義自昔所重取與之際始節必嚴臣職爲京員此項銀兩固在受之列不得不先事請

命以臣愚賤何足尙論明知臣此疏一出望者嫌怨議

者違駁至於譏彈亦所不避誠以一介雖微所關者大欲潔先亂魯論有誅若臣當此忍隱弗言同乎流俗竊恐一世士風江河日下詎復有所底止儻臣此言幸存卽令格於吏議俾不得行至執禮經少賤之說以相糾繩臣固無所逃命然使天下後世知當時

朝廷崇儒重道之意與一時士夫抱道自重之心亦卽所以上答

天恩下立臣極臣萬死何辭臣爲政體士風起見謹具疏奏

聞不勝惶悚待罪之至伏祈

皇太后

皇上聖鑒謹

奏

光緒十年二月初八日奉

上諭翰林院代遞編修王懿榮奏京員津貼銀兩請飭

各省妥籌開款更定名目作正開銷一摺著戶部議奏  
欽此

請復古本尙書附入十三經注疏與今本尙書並  
行疏

光緒十年二月初八日

奏爲請復古本尙書附入十三經注疏與今本尙書並  
行以宏

文教恭摺仰祈

聖鑒事竊

臣

伏見乾隆朝

高宗純皇帝欽定二十四史以曾劉昉等所撰舊唐書  
宋薛居正等所撰舊五代史附入全史新舊兩書並行

飭

武英殿刊布頒示天下

稽古右文

宏鑑遠識前代所無甚盛典也

臣

惟尙書一經載堯以

來二帝三王之政粲然大備顧自遭罹秦燔重厄斯文  
漢旣奮興旁求典籍得自濟南伏勝者名曰今文出自  
孔子宅壁魯孔安國所定者別曰古文終漢之世二者  
代興並立學官雖其書自先秦以來字形遞變師說各  
異乖疑難正在所不免然卽漢人所傳熹平中一刻於  
碑石魏正始間再刊爲三體凡此舊文旋並淪失皆由

晉永嘉之亂經籍道消當時古文僅存中秘今文漢注  
傳習無人一遭寇變泯焉斯滅於是今本尚書出焉今  
本尚書者晉豫章內史梅賾所上於朝唐貞觀中孔穎  
達爲之疏者也篇中所具古文乃刺取秦漢子史各家  
所稱引者傳會造作又復依託孔傳真僞淆雜覲然成  
書自宋儒朱熹以來遞生疑議爭詆爲僞古文以迄近  
世羣相論辨各有專家無須陳列然揆厥名實文則非  
眞理無或謬良由玉石紛乘涇渭同流執其兩端時見  
微愆猶如披沙揀金往往得寶故歷代沿革隸於經典  
流傳有年自弗可廢我



高宗純皇帝聰明天亶牖啟後人

欽定四庫全書總目提要刊定羣言辨其眞僞昭然發  
矇萬世師資一時臣工承流宣化譔著多人繼絕興廢  
實超往古有前臣山東督糧道孫星衍撰尙書今古文  
注疏三十卷搜輯前漢今古文及各家古注之僅存者  
編次成書類復其舊又徧采前人傳記之涉書義者備  
疏其下不逞私臆最稱矜慎坊肆刊置所在流行是則  
網羅放失守闕抱殘所錄古文爲眞古文所采古注爲  
眞古注視晉唐以來所行之今本尙書實爲有漢相傳  
古書之遺文亦卽爲去古稍近之眞本就今本區別言

之猶兩唐書兩五代史之當分稱新舊不得不以古本之名名之也伏思尙書一書經中之史史中之經二帝三王心法治法畢見於斯不存其真曷用其極以之比較舊唐書舊五代史得邀

天鑒並列學宮者所關尤大臣觀後漢陳元疏立左氏傳博士能於真僞錯亂孤學少與之際解釋先聖之積結淘汰學者之累惑南齊陸澄領國子博士時議置諸經學能於南北陵雜微言將絕之時論易之當主鄭元不可獨用王弼左傳宜於服虔之外兼立賈逵杜預伊何人斯尙知體要矧臣今日生逢

盛世職在翰林管見雖微敢不上達伏請

皇太后

皇上俯準

臣

奏上法

高宗純皇帝以舊唐書舊五代史附入二十四史并行之意飭下

武英殿及今補刊羣書板葉之時行文江蘇學臣徵取其書刊附舊刻十三經之內使與今本尙書注疏並行以存二帝三王遺書逸文之真以見我

皇上法

祖同

天之美是則千五百餘年一綫不絕晦而復明佚而復存之真古文尙書得遇我

朝

聖

聖相承始克大著於天下一經之正誠非偶然經正民

興孟子言之

臣

爲往聖幸

臣

尤爲天下幸矣擬並請

特旨通飭各省督撫學政各官嗣後凡遇大小考試命題至尙書一經準其兩本並用頒爲功令以資永遠蓋設科勸學傳業浸盛祿利使然漢已如此正不獨爲今日言之已也夫政莫大於求實禮莫隆於復古現值我

皇上典學方殷之時端求古帝前聖心法治法之真臣  
故不揣冒昧妄陳瞽說不勝恐懼悚惶之至伏祈

皇太后

皇上聖鑒謹

奏

光緒十年二月初八日奉

上諭翰林院代遞編修王懿榮奏請復古本尙書與今  
本並行一摺着禮部議奏欽此

醇親王位分尊崇請恪遵御論收回成命疏

光緒十年

三月

奏爲醇親王分位尊崇恭請

懿旨收回成命宜恪遵

高宗純皇帝御論隱全大義爲

皇上曲盡恩禮以維綱常而重倫紀恭摺仰祈

慈鑒事

臣

於本月十四日恭讀邸鈔欽奉

慈禧端佑康頤昭豫莊誠皇太后懿旨軍機處遇有緊要事件著會同醇親王奕譞商辦俟皇帝親政後再降懿旨欽此仰見我

皇太后軫念時艱深恨庸臣輾轉

宸衷萬不得已迫而出此薄海臣民稍具天良同深感

激臣惟政事之本以綱常倫紀爲先

皇上御極之初我

皇太后特申

懿旨醇親王賞食雙俸加恩世襲罔替並令開去一切差使

聖謨淵深義盡仁至綱常倫紀之正已端於此臣嘗伏讀

高宗純皇帝御批通鑑輯覽於宋治平閒詔議崇奉濮王事

御論取歐陽修援引禮經爲得於宋正德閒詔議崇奉

興獻王事

御論尤以隱全大義爲宗深恨有明諸臣不能於天理人情斟酌至當

聖訓煌煌萬世人極今醇親王頤養閒居長承

天眷揆諸今昔事理不同然而社稷君父之義千古如

一臣綜觀往代上繹禮經以社稷之義論君父則社稷

重而君父輕以君父之義論社稷則君父重而社稷輕  
皇上入承大統爲

文宗顯皇帝之子社稷之事也義不顧私宋臣司馬光  
言之我



皇太后天亶聰明是以有開去醇親王一切差使之旨誠以君臣之禮

皇上之於醇親王所不能施倘預

國是卽類共臣遂多滯礙大易有云有父子然後有君臣有君臣然後有上下有上下然後禮義有所錯則綱常倫紀之地固宜恪遵

高宗純皇帝隱全大義之論爲至極也

臣敢敬繹

御諭以今日事理推闡而直陳之恭讀

懿旨有云軍機處遇有緊要事件著會同醇親王商辦臣惟今日事件惟交涉夷務籌兵用人最爲緊要自同

治以來外夷放恣民心久憤特以

聖慈布濩遐邇一體愛惜生靈不忍黷武窮邊釁開自我曲示包容而盈廷諸臣不求根本一意畏葸遇事敷衍誠如

聖諭知其決難振作然天人震怒積弱生強自然之理用夏變夷料諸來日醇親王爲

先帝親藩久典禁兵公忠爲天下所共知謀略爲夙昔所素裕惟邊事用兵自與當年剿辦髮捻有異外洋各國情形之強弱水陸之要害兵食之緩急種種機宜千變萬化詎同往轍內須切實講求而外則一軍之勝負

一計之短長難可預料夫以髮捻諸頑同產中土有胡  
林翼曾國藩之長策尙須上煩

宸慮指授方略遲之十餘年而後奏效使自今以往若  
有邊防兵事簡任人才籌辦糧糈軍機大臣謹奉

懿旨會同醇親王商辦就第接見無論體制若何禮節  
若何儻事前有論斷之不合事後或得失之互見直臣  
當此進退難安諍臣當此言則不敬而奸邪乘閒昧於  
善則歸親惡則歸己之義偶遇失算暗圖諉卸設醇親  
王稍有含隱難言之衷我

皇上錫類推心又將何以自慰臣之所謂宜爲

皇上曲盡恩禮者正在於此臣愚見擬請

皇太后收回成命現在

皇上尙未親政遇有緊要事件醇親王體

國忠誠自可隨時奏上

皇太后以資

採擇發交樞臣審量萬全眾謀僉同事事都歸實際以免諸臣會同商辦終涉嫌疑之迹是

皇太后之於醇親王旣隆恩禮之加而醇親王有收坐論之功並無褻尊之虞益以厚我

皇上天性之德社稷君父之義輕重兩全綱常由此而

正倫紀由此而敦我

高宗純皇帝隱全大義之論櫟括今古實見於斯正不徒異日之稟承有方美善無弊已也中庸所載非天子不議禮至於

皇上親政以後現已奉有

再降懿旨之命將來一切典禮自歸

皇太后

皇上

天心聖裁酌理準情折中有當宋明往事議說紛紜君子小人雜出其際邪正各判史冊堪徵今日既事理之

不同臣亦不敢妄爲援據致有難行益增罪戾惟臣束髮受書稍知大義十年以來思之爛熟謹遵

高宗純皇帝御論隱全大義一旨爲綱常倫紀起見不揣愚妄昧死上

聞是否有當伏祈

皇太后

皇上聖鑒謹

奏

請速開馬頰分減黃流以弭東患而衛畿輔疏

奏爲河勢日北請速開馬頰分減黃流以弭東患而衛

畿輔仰祈

聖鑒事竊以 畿輔之有天津河間二府在夏周之會  
爲九河入海故道河之由今山東入海者漢宋始開其  
端我 朝咸豐五年河南蘭儀銅瓦廂決口復宋故道  
河從大清河入海者迄今三十餘年大清河窄日淤日  
高武定與天津屬縣毗連地勢東高北下若不設法分  
減黃流將來水性就下積漸之勢在天津甚可慮也去  
年山東巡撫張曜以籌辦山東黃河各工屢次條奏奉  
旨以疏通下游挑濬中腹爲緊要關鍵

聖謨深遠已摺盡從來治河家言第一要旨

臣愚伏見

河自北下已漸有欲復九河故道之勢近來山東連年  
決口其爲水大地高自不待言而畿南靜海滄州以  
及文安霸州一帶爲歷年霖潦積水不涸之區本年衛  
河漫溢吳橋北方水氣日盛誠不可不思患而預防之  
也銅瓦廂決口河面寬至十里有餘及灌入東省大清  
河河面僅止里許淤墊日久稍遇盛漲無不沖決山東  
巡撫近日開通徒駭分設水門引河入海自是長策然  
徒駭河上游面寬不過三四十丈且多淤淺實不如兼  
用馬頰以分其勢爲益尤太馬頰河身寬有百數十丈  
兩岸屹立大段深通但使培殘補缺挑深增高即可暢



流入海兩河並用黃水自然分減往歲侍郎游百川曾有開河減水徒駭馬頰兼用之奏當時以開河減水恐碍畿輔格於吏議此未深悉直東兩省河道之情形也黃河奪衛入海始能侵及畿疆馬頰一河首尾皆在山東地面其中雖經慶雲縣界約不過二十里以下仍由海豐縣月河口入海去直隸五河尚有百餘里或數百餘里之遙即使橫衝旁溢所距尙遠且與徒駭均在下流豈有遽入直沽之理況今之所謂徒駭馬頰兩河土名沿稱冒爲古河而皆非禹河故處一曰土河一爲篤馬河實則年年瀝水洩路瀝水者伏秋霖潦之所

匯也瀝水旣入而伏秋兩汛黃水適來泥沙一淤並瀝水亦消納無所明周用有言河所以有徙決之變者以霖潦無所容也今旣疏通徒駭趁此兼挑馬頰以分河流不惟瀝水有所容納并河溜亦於焉蓄洩又況衛河爲運道所關自臨清而北東去黃河有近至四五十里者尋常秋冬水落河水倒灌尙能使衛河數百里皆作黃色儻不急從下流廣爲疏濬萬一大溜西掣奪衛北來則畿輔東南勢必一片汪洋而天津爲眾水所歸形如釜底水無不下不逕入直沽以復九河故道不止河運之道旣壞卽海運入口亦恐多阻此非河之經流

將自復故道也東高北下積漸之勢之爲之也不察其  
勢而狃於馬頰之稍涉慶雲便謂有碍 幾輔不知兼  
開馬頰之爲洩瀝水而一旦引黃北灌直趨衛河始悔  
謀之不早此臣之所以請兼開馬頰者非僅爲洩東省  
之霖潦而實隱以防黃流之北徙也且治河之道貴在  
相時制宜後世昧於河不兩行之說不知此爲經流大  
勢之常理而非一隅治河之通論宋臣蘇轍謂黃河之  
性急則流通緩則淤澱旣無東西皆急之勢安有兩河  
並行之理我 朝胡渭駁之言古河未有不兩行者禹  
醴二渠爲萬世法自參以上則宋之二股卽唐之馬頰

以此爲枝渠受河水十之一二亦自無害但不可令指  
大如股其說篤至惟入海之通塞尤視治法之短長九  
河入海神禹功用全在逆河播爲九河又合爲逆河蓋  
借其衝激之勢以捍海潮今九河旣不可復則當師逆  
河之意而不泥其文宋之鋸牙明之磯嘴最得逆河用  
意明平江伯陳瑄治河於淮安府山陽縣滿浦坊仿宋  
史鋸牙遺制累石爲山蜿蜒千尺水得翻騰踴躍以入  
海俗謂之磯嘴磯嘴之制下布七星椿椿上繫以石石  
有筍筍相入縱有錠錠三層灌以糯米砌以油灰長千  
尺當時濁流不入運河河不勞挑濬者磯嘴之力也是

磯嘴爲激河入海要訣蓋河之宣洩以海爲尾閭海逆而上河逼而下河之力不敵海泥沙噴壅而河患遂生海水潮汐日二至其出入皆以二時海水遏河水不得暢流者每日有八時黃河一石水而六斗泥海受河之水不受河之泥又能遏阻河溜使其不能迅速入海積而不得洩則海口壅蔽河身停淤乃勢之不得不然此河海相接處之情形亦卽全河泛濫衝掘之情形也今於徒駭馬頰二水入海之處仿磯嘴之制量爲變通借其勢以禦海潮相沖相激海不能以洶湧之勢遏阻黃溜則內沙不停外沙不入隱然一逆河之意又安見有

河不兩行分流力弱之可慮哉以臣愚見可否仰祈

天恩飭下直隸山東兩省疆臣會同勘驗相度形勢如屬可行使徒駭與馬頰同時並挑庶年年伏秋兩汎瀝水有消受之區河流泯填闕之患東流既暢北徙無虞豈不甚善臣籍隸登州去河甚遠於武定府屬行水各州縣無所用其偏護又非故以保衛

畿輔一言爲危詞聳聽之舉惟察河勢日北積漸堪憂民命所關國帑所繫運道所在既有所見不敢自安緘默伏祈

皇上聖鑒訓示謹

奏

四庫全書懇恩特飭續修疏

光緒十五年六月十六日

奏爲

四庫全書事關文教請俟方略會典兩書告成後懇

恩特飭續修事

臣

伏見乾隆朝

高宗純皇帝欽定四庫全書分經史子集四目所收書籍上自周秦以迄我

朝三千餘年聖作明述之迹粲然大備中間恭載

列聖御製全集

御纂

欽定各書牢籠天地彪炳古今漢唐以來文章美富未有若斯之盛者也至我

皇上御極之十有五年時經百載開通日廣文物日新厥有市舶泛來前代流傳海外之書又有乾隆以後通材碩學網羅散失采集逸佚復古再成之書說經補史重注重疏精校精勘之書以及天文算學輿地方志政書奏議私家撰著卓然經世之書層見疊出或先得者殘而重收者足或沿稱者僞而改題者真考據一門後來居上藝數之流吮出愈精若此之類上溯舊例應行著錄者其爲粹美庶幾前編皆所以導揚



盛治恢崇至道千載一時於今爲烈臣愚以爲

皇上親裁大政庶事求舊以

聖紹

聖美善畢臻所宜重開新館續纂前書

萬幾清暇藉資

乙覽以今翰林院衙門講讀編檢諸員幾二百人加以  
後來

恩科選用爲數益夥館閣諸差較之部曹又爲簡易歲  
糜俸銀季分廩祿仕優則學朝夕論思職亦宜然且近  
三十年來學術之變亦汲汲矣篤實之風漸微而新學

異說紛然競起見異者或視古學爲迂務外者輒以中華爲陋若不及今整齊百氏一其指歸其爲流弊豈可勝言孔子曰博學於文約之以禮明學術以正之則孟子所謂道揆法守者將在於此此尤

皇上所以繼述

高宗純皇帝之盛心而爲天下治道之大防者也現在方略會典兩館齊開

欽派總裁大臣有日不暇給之勢一俟兩書告成之後可否請

旨飭下掌院學士議定重開

四庫全書館卽院修書不支薪炭不開保獎所修之書  
一遵前例外省采進分派編校各撰提要總裁閱看每  
成一類輒塵

御覽應鈔應存恭候

欽定將來

國史諸志亦卽藉此取材俟屆三年掌院學士量其勤  
惰品其高下以爲考課歸入京察事以繁而不費官以  
修而無曠蓋厚重少文前史所稱此指其人質性而言  
未聞有不多識前言往行以蓄其德而能設施爛然足  
裨實用者造就人材亦在於此惟次第取辦從容就理

不涉鋪張自歸實際凡事皆然矧在政體臣故不敢造次請

命而致昧於先務之急也冒瀆陳詞誠惶誠恐謹請代奏伏乞

皇上聖鑒謹

奏

臚陳本朝儒臣所撰十三經疏義請列學宮疏光緒

十六年六月十六日

奏爲臚陳本朝儒臣所撰十三經疏義請

賜取列學宮以光文治事竊維經者徑也易書詩禮春

秋昌明博大如日月之周乎天注猶瀉也毛鄭何趙杜  
范廣達疏通如江河之行乎地皆所以綱紀人倫維持  
風俗異教入而卽湮邪說來而遂化遭時制宜其用無  
窮是以漢崇師法十四博士並置學官隋錄名家五千  
餘卷同收甲部唐孔穎達奉敕首編正義宋邢昺受詔  
兼疏眾經斯誠前代之隆規先儒之盛業甄陶六合整  
齊百家我

聖朝之有天下也聲教覃敷敦崇經術

列聖建極

御纂尤繁稽古同天啟兩大精微之蘊觀文成化定四

方億兆之心昭雲漢而爲章牖黔黎以至道

上行下效經正民興臣伏見自乾隆以來至於今日海

內經學各有當家剖析條流發起隱漏十三經說粲然

將備折衷求是遠邁漢唐時則有若湖北安陸儒臣李

道平所撰周易集解纂疏江蘇陽湖儒臣孫星衍所撰

尚書今古文注疏長州儒臣陳奐所撰毛詩傳疏安徽

績谿儒臣胡培翬所撰儀禮正義江蘇句容儒臣陳立

所撰春秋公羊傳正義浙江嘉善儒臣鍾文蒸所撰穀

梁經傳補注江蘇寶應儒臣劉寶楠所撰論語正義甘

泉儒臣焦循所撰孟子正義儀徵儒臣阮福所撰孝經

義疏補山東棲霞儒臣郝懿行所撰爾雅義疏其他經說以博通見表不屬疏義者不在此例所有各書或經進

御覽或流布學校可否請

旨飭下各直省督撫於各該員原籍所在卽家徵取定本分咨各直省有書局之處詳細校勘刊刻成函將板片彙送國子監衙門存儲以便陸續刷印頒行直省各學嘉興士林俾資講習元建康道徧牒九路鐫全史而命校官宋撫州庫廢冊千箱墨羣書以給多士從此膠庠引重祛金貨漆字之私將來華裔流傳識虎觀鴻都

之大

國之庠美士之英華何以逾此惟大小戴雜四大之文  
因革殊制左邱明綜五方之史聞見異辭以較他經本  
爲繁重寶應儒臣劉文淇撰左氏傳正義業專一家事  
歷三世行將寫定至周禮禮記二書疏義風聞江浙兩  
省承學之士方事潛研尙屬草稿一俟異日三書嗣出  
並令各該省學臣隨時疏報由國子監官公同審詳與  
前各書義出一律查照現案請

旨施行臣竊以疏家之義志在輔注所從之注情在善  
經往往眾說紛斥一師墨守侈主奴之迭見任得失之



並生然家法嚴而後古義堅門徑清而後學派正其能  
久遠亦在於斯惟斯諸臣學識兼長野言旣刪僞傳復  
黜見以博而理愈通知以真而用彌切雖集思廣益倚  
撫有待於後人而抱關守殘掇據已賅夫先哲至如戴  
德纂記爰及漢昭比於羣經自爲羣雜然劉向目錄業  
入經篇宋代儒家已稱顯立則有山東曲阜儒臣孔廣  
森所撰大戴禮記補注援據精深訂盧辨之佚文續康  
成之緒說所當翼附尾隨如驂之靳又如漢許慎說文  
一書存六書之規躅爲羣經之階梯有江蘇金壇儒臣  
段玉裁所撰說文解字段氏注山東安邱儒臣王筠所

撰說文句讀釋例最爲該洽譬之杜林訓纂之作入藝  
略以兼存元度字樣之書儼石經而並立相應請

旨一併飭各該省由書局刊送國子監附此次各經注  
後依類印行使我

朝諸儒所纂經學小學之書類水辟雍粹然並陳一臻  
盛美臣竊伏念魏晉而後易無完注書無完經眞贗相  
參奪譌踵起中更荒廢如罹秦燔千百億言無關闕悵  
不遇我

朝

君臣同德千載一時握璣鏡以式九圍運斗樞而敷五

教何以索隱鉤深精窮奧業存真截僞澡雪前修大義  
乖而復昌微言絕而重續符三代同風之盛成儒者逢  
辰之期迺知神聖化光等百王而立教風雅道著合四  
海以來同作述之美旣彰太平之望允塞臣爲闡揚文  
治起見謹請代

奏伏乞

皇上聖鑒謹

奏

光緒十五年六月十八日奉

上諭翰林院編修王懿榮呈請續修四庫全書並臚陳

本朝儒臣所撰十三經疏義請飭取列學宮各一摺著  
俟會典纂輯告成後由翰林院奏明請旨欽此

訓飭衍聖公向學并飭整理衍聖公府地產疏

光緒

十五年六  
月十六日

奏爲籲懇

聖恩訓飭衍聖公向學并飭山東巡撫整理衍聖公府

地產事

臣

惟孔子大聖以一身立人倫之極使天下後

世永受其福而天下後世雖有水旱夷狄人心不至動

搖倫常不至漸滅者孔子之功也前代尊崇始末弗衰

尊則加封崇則增秩或隸復租稅或官出酒脯有虛文

之假借鮮實意之輸將自我

朝忠厚開基超越往古尊師重道曲禮優隆

臣伏讀

世宗憲皇帝雍正二年諭衍聖公孔廣森之訓曰至聖先師後裔當存聖賢之心行聖賢之事一切秉禮守義以驕奢爲戒且爾年齒尙少尤宜勤學讀書敦品勵行不但爾一人凡爾同族之人皆當共相勸戒共相砥礪爲端人正士爾等果能遵朕諭學問日進品行純篤不墜家聲卽所以報國矣

聖謨宏遠教孝教忠所以追答孔猷先命之功者至此已極以

聖契

聖相保相維義盡仁至是以

栽培篤厚挺生賢哲子孫著聞代不乏人乾隆閒翰林院檢討孔廣森通春秋公羊何氏學大戴禮太常寺博士孔廣林治高密鄭氏學兄弟同時卓然經師文章之美冠絕當世咸豐閒直隸交河縣知縣孔慶鈺五經博士孔繁澀父子忠孝萃於一門生爲聖裔躬被

德化積累所成良非偶然唐宋以來未之有也至七十五代衍聖公孔祥珂幼而多病中年短折外戚任事家用不康折毀牆屋遭罹火災書籍圖錄散亡殆盡加以

恩賜田產百戶把持任意出納錮蔽日深漸多迷失尾  
山洙泗兩書院久已廢弛門庭荒蕪家計零落今襲封  
衍聖公孔令貽年甫弱冠資性穎異自宜及時向學勤  
修德業長承

恩眷蔚爲

國華若席世祿之餘風恐墜習俗之嗜好是非遴選名  
師爲講習討論不足以資啟迪裕裁成至其田產租糧  
經管侵吞朦混多弊積重難返非官爲清理不足以定  
出入供糴盛臣故伏念孔子盛德百世必祀

世宗憲皇帝聖訓千古昭垂當此之際正仰賴

朝廷作育振拔之時以臣愚見可否仰懇

恩旨飭下山東巡撫於各直省經明行修之士審擇一人重禮延請前往曲阜嚴課孔令貽認真讀書並兼課四氏學子弟優其脩脯每年由東省閒款項下加

恩提給俟孔令貽年長學成再令勿庸支發并揀派一妥實道府大員前往曲阜會同地方官清查衍聖公府地畝稽核租糧確定章程擇人經管一清積弊每年年底由地方官詳查結報該撫存案如經管人再有前項情弊卽由地方官斥責驅逐隨時更換每於該撫出省巡閱及學政按臨到兗之日事畢親詣該府一爲查考



以資久遠孟子有言聖人人倫之至也天下後世共被孔子人倫之澤而我

皇上卽上繼

世宗憲皇帝之志以加厚於聖裔者爲追答夫孔子

至德莫名傳於罔極上稽前代有敦崇之虛文無維持之實意者以古揆今方斯蔑矣仰籲

天恩可許

臣

請謹請代

奏伏乞

皇上聖鑒謹

奏

王文敏公遺集卷第二